

M/S : 21



DARI kiri, Adlyn, Devi dan Myra hadir ke Jabatan Pendaftaran Negara (JPN) Putrajaya bagi membuat permohonan daftar kelahiran anak mereka yang lahir di luar negara. - Gambar NSTP/SAMADI AHMAD

DAPAT PERHATIAN JPN

Berjuang sejak 17 tahun

Oleh Samadi Ahmad
am@hmetro.com.my

Putrajaya

Tiga wanita kegembiraan apabila permohonan daftar kelahiran luar negara anak mereka mendapat perhatian dari Jabatan Pendaftaran Negara (JPN) di sini, semalam.

Tiga wanita berkenaan hadir di JPN di sini, pada jam 10 pagi ditemani anak masing-masing bagi membuat pendaftaran permohonan daftar kelahiran anak yang lahir di luar negara.

Ahli perniagaan, Vimala Devi Muniappan, 48, berkata, dia berjuang selama 17 tahun untuk mendaftar kewarganegaraan anak lelakinya yang lahir di Perancis.

Menurutnya, dia berkahwin dengan warganegara Perancis dan tinggal di sana sejak 1998, sebelum pulang ke tanah air pada 2019.

Katanya, ketika di Perancis dia pernah berhubung dengan Kedutaan Malaysia di sana bagi mendapatkan permohonan daftar kelahiran anak namun gagal.

"Selepas pulang ke tanah air saya pernah membuat permohonan kepada Kementerian Dalam Negeri (KDN), namun sehingga kini belum terima jawapan," katanya.

Bagi kakitangan bank di Cyberjaya, Myra Eliza Mohd Danil, 30, berkata, anak perempuannya dilahirkan lapan tahun lalu di Zambia ketika menziarahi keluarga suaminya.

Menurutnya, ketika itu dia sedang mengandung dan doktor di sana menasihatkannya supaya pulang ke tanah air selepas melahirkan anak bagi tujuan keselamatan.

Katanya, selepas pulang ke tanah air dia berjuang selama lapan tahun dengan pelbagai cara mendapatkan taraf kerakyatan anaknya termasuk memfailkan di mahkamah.

"Kami semua berdepan banyak kekangan dari segi pendidikan kerana tidak mempunyai kad pengenalan termasuk berhadapan kos tinggi setiap tahun bagi memperbaharui visa dan pasport."

"Kami berharap kerajaan dapat menyemak semula undang-undang berkenaan perkahwinan membabitkan wanita Malaysia dengan warga asing di luar negara supaya ia diberikan setaraf kepada golongan lelaki warganegara yang berkahwin dengan warga asing," katanya.

Turut hadir pada permohonan daftar kelahiran luar negara anak di JPN itu adalah Adlyn Adam Teoh.

Mereka turut memaklumkan permohonan itu akan mengambil masa selama tiga bulan untuk diteliti JPN sebelum diluluskan.

Baru-baru ini media melaporkan Mahkamah Rayuan menolak permohonan kerajaan untuk menagguhkan perintah Mahkamah Tinggi berhubung isu kerakyatan anak yang dilahirkan di luar negara oleh wanita Malaysia yang berkahwin dengan warga asing, sementara menunggu keputusan rayuan.